

## SER Sociaal Economische Raad: Un conoci desconoci



**ORANJESTAD – Bon Dia Aruba tabatin un entrevista cu Felix Bijlhout, Secretario General di Sociaal Economische Raad (SER), na Papiamentu Consejo Socioeconomico, un organismo importante, segun nos opinion en todo caso, cu sin embargo no ta semper den luz di publicidad. Pa cera conoci (di nobo) cu e organismo aki, a repasa cu sr. Bijlhout e trabou cu SER ta haci pa nos comunidad.**

Consejo Socioeconomico ta un organismo di consulta y consejo independiente, cu a ser crea pa gobierno, y ta ase-

sora gobierno tambe den tur topiconan socioeconomico importante. E consejo tin un composicion 'tri partite', loke ta encera representacion equitativo di sindicato, gremio empresarial y gobierno den e consejo.

Miembronan di SER ta discutí tur e problemanan socioeconomico y ta emiti consejo, nota, informe, solicita of no solicita pa gobierno. Di e manera aki, SER cu su consehonan ta representa un di e 'checks and balances' den nos sistema democratico, y ta duna un indicacion na gobierno si ta existi of no apoyo den comunidad, y den eco-

nomia, pa e planman riba cual gobierno ta desea un opinion independiente, prome cu pasa pa ehecuta esaki. Durante e entrevista, sr. Bijlhout a splica cu e organizacion ta constitui di dos parti: e Consejo y Secretariado; e Consejo ta consisti di e 9 miembronan, tres representando sindicato, tres pa e gremionan empresarial (dunado di trabou) y tres di gobierno. E Secretariado ta e oficina di apoyo pa e Consejo por haci su trabou.

Bijlhout ta elabora riba e areanan riba cual e organizacion ta enfoca, principalmente den areanan manera: politica

macro-economico, desaroyo sostenibel, seguridad social, pension, politica di mercado laboral, condicionnan di trabou, politica social, asunto di consumidor, finanzas publico, salud publico y politica educativo.

SER a uni na e Asociacion Internacional di Consejo Socioeconomico y di Institucion Similar (AICESIS), reaccionando riba globalisacion den su area di trabou y su participacion den esaki.

Como un organo di consulta y consejo, SER tin su mision basa riba interes general y investigacion of analisis, pa proporciona consejo confiable pa un of mas minister y sociedad tambe, cu e obhetivo di identifica varios aspecto den e campo socioeconomico. Su vision ta cu nan ta un organizacion profesional, cu ta reconoce y ta comprende sociedad, pa por brinda consejo al caso y obhetivo, basa riba hecho.

SER tin tarea tambe di duna consejo prescribi pa ley, manera ta e caso di e consejo anual encuanto e situacion di salario minimo, unda SER, a base di e ley di salario minimo (Landsverordening Minimumlonen), ta duna consejo riba adaptacion di salario minimo. Pa haci esaki, SER ta investiga e situacion di inflacion den e aña anterior, tumando comparacion di e inflacion entre augustus di e aña anterior, y di e aña coriente, pa establece cuanto e inflacion ta, riba cual ta basa e consejo. Proximamente, gobierno, lesa aki e ministro encarga cu labor, ta dicidi riba e eventual aumento. Naturalmente, pa haci esaki mester di un estudio di henter e situacion economico den e periodo analisa, pa por yega na un

consejo balansa y completo.

Pa casualidad, na e momento aki tin un consejo encuanto e salario minimo, pero lamentablemente no por a comparti esaki ainda, pasobra e publicacionnan di SER standard ta bay prome pa gobierno, y despues ta mantene un periodo di embargo di 30 dia, prome cu SER divulga su informe na publico. En todo caso, nos por deduci cu despues di algun aña casi sin inflacion, e diferencia entre e CPI (consumer price index) di augustus 2017 y di augustus 2018 ta considerabel: 116.3 na 2017 compara cu 122.2 na 2018. A pesar cu nos ta curioso pa sa kico e consejo di SER ta, nos ta respeta e normanan al caso, y lo warda riba e resultado cu lo keda publica proximamente.

Esaki ta loke SER ta haci? No, ta haci hopi mas, y ta remar-cabel e cantidad di rapport cu ta disponibel riba e website di e entidad: [www.ser.aw](http://www.ser.aw). Djis pa duna un impresion di ultimo tempo:

Recomendacion encuanto e proceso di referendum, juli 2018;  
Recomendacion encuanto e Ley di Recuperacion Economico, juli 2018;  
Atrae turista cu un entrada relativamente halto, juli 2018;  
Informe encuanto e crisisheffing y otro prevision fiscal, juli 2018... Y aki nos no ta ni papia ainda di e trabou haci den tur e añanan prome cu e actual. Nos ta sigur cu hopi hende no a yega di tende mes di e actividadnan aki, y honestamente nos ta haya cu e rapportnan aki, traha pa bienestar di comunidad, y cu placa di comunidad, y cu hopi aspecto valido den nan, merece mas atencion den prensa. Nos lo sigui e trabou aki mas di cerca, esey ta sigur.